

## Evening Dogri News Bulletin, 05 June 2024

इवनिंग डोगरी न्यूज़ बुलेटिन  
समे-18:15 Hrs

### Headlines

- 1 प्रधानमंत्री नरेंद्र मोदी हों अगली सरकार दे गठन शा पैहले अपने मंत्रीमंडल दे कन्नै राष्ट्रपति द्रौपदी मुर्मू हों गी इस्तीफा देई दित्ता ऐ।
- 2 चीन नै लोकसभा चुनाव च जित्त लेई प्रधानमंत्री नरेंद्र मोदी ते एनडीए गी मुबारकबाद दित्ती ऐ।
- 3 पर्यावरण सरबंधी मुद्दें पर जागरूकता पैदा करने सने लोडचर्ची कार्रवाईएं ते वैश्विक सैह्योग गी बढ़ावा देने लेई अजज दुनिया भरै च पर्यावरण सरबंधी कुल संसारी ध्याड़ा मनाया जा करदा ऐ।
- 4 लेफ्टिनेंट गवर्नर मनोज सिन्हा हों आखेआ ऐ जे पर्यावरण गी सब्बनें शा अग्गे रक्खना उंदा नजरयि ऐ ते ओहू तबाहू होए दे पर्यावरण तंत्र गी वापस औदे असल स्वरूप च आहने लेई बचनें-बज्जे दे न।

<><><><><><>

### PM-REsignation

प्रधानमंत्री नरेंद्र मोदी हों अज्ज राष्ट्रपति भवन च राष्ट्रपति द्रौपदी मुर्मू हुंदे कन्नै मुलाकात कीती ते उनेंगी अपना ते केंद्रीय मंत्रीमंडल दा इस्तीफा सौंपेया। राष्ट्रपति हों इस्तीफा मंजूर कीता ते प्रधानमंत्री ते उंदे मंत्रीमंडल गी नमीं सरकार बनने तोड़ी कम्म करदे रौहने लेई आखेआ।

<><><><><><>

### Cabinet-Meeting

प्रधानमंत्री नरेंद्र मोदी हुंदी सरकारी कोठी पर अज्ज केंद्री मंत्रिमंडल दी बैठक लगगी जेदे च 17मीं लोकसभा गी भंग करने दी सफारश कीती गई। केंद्री मंत्री अमित शाह, नितिन गडकरी, राजनाथ सिंह ते होर बी केंद्री मंत्री इस बैठक च मजूद हे। लोकसभा चुनाव च एनडीए दी जित्त दे इक दिनै परैत एहू बैठक लाई गई ऐ।

<><><><><><>

### NDA-Meeting

नमीं दिल्ली च प्रधानमंत्री नरेंद्र मोदी हुंदे आवास उप्पर एनडीए दी बैठक लगगी। इस बैठक च नेताएं लगातार त्रीए कार्यकाल लेई नरेंद्र मोदी हुंदी अगुवाई च नमीं सरकार बनाने लेई भविष्य दे कम्मं दा रस्ता तय कीता। इस बैठक च तेलगू देशम पार्टी दे प्रधान एन. चंद्रबाबू नायडू, जनता दल यूनाइटेड दे प्रधान ते बिहार दे मुख्मन्त्री नितीश कुमार ते लोक जनशक्ति पार्टी दे प्रधान राम विलास पासवान ते एनडीए दी बाकी पार्टियों दे नेता मौजूद हे।

<><><><><><>

### JDU-NDA

जनता दल यूनाइटेड नै आखेआ ऐ जे ओहू नरेंद्र मोदी हुंदी अगुवाई आले एनडीए गठबंधन गी पूरा समर्थन देगा। पार्टी दे प्रवक्ता के.सी त्यागी हों आखेआ जे आई.एन.डी.आई गठबंधन शा बाहर जाने दिआं वजहां अजें बी मजूद न इस करियै उंदे कोल वापस जाने दा कोई सोआल गै पैदा नेई हुंदा। त्यागी हों इब्बी आखेआ जे उंदी पार्टी बिहार दे विकास लेई विशेष दर्जे दी मंग करदी ऐ। उनें दोष लाया जे आई.एन.डी.आई. गठबंधन अफवाहीं दा केंद्र बनी गेदा ऐ पर नां गै कांग्रेस ते नां गै आई.एन.डी.आई. गठबंधन कश सरकार बनाने दा बहुमत ऐ। त्यागी हों साफ करी दित्ता जे बिहार दे मुख्मन्त्री नितीश कुमार एनडीए गी अपना पूरा समर्थन देआ करदे न।

<><><><><><>

### China-Modi NDA

चीन नै प्रधानमंत्री नरेंद्र मोदी हों गी भाजपा दी अगुवाई आली एनडीए दी आम चुनाव च जित्त लेई मुबारकबाद दित्ती। भारतीय चुनाव आयोग नै लोकसभा चुनाव दे परिणाम घोषित कीते हे जिदे च भारतीय जनता पार्टी नै 453 चां 240 सीटां जित्तियां ते कांग्रेस नै 99 सीटां जित्तियां। भाजपा दी अगुवाई आली एनडीए नै 272 दा जादुई आंकड़ा पार करी लैता ऐ। चीन दे विदेश मंत्रालय दे प्रवक्ता माओ निंग हों आखेआ जे उनें प्रधानमंत्री नरेंद्र मोदी हों गी जित्त दी बधाई दित्ती ऐ।

<><><><><><>

## JDU-RJD Leaders

बिहार दे मुखमंत्री नीतीश कुमार होरें एनडीए दी बैठक च हिस्सा लैने आस्तै दिल्ली पुज्जी गे। जेडीयू दे सांसद संजय झा होर बी नीतीश कुमार हुंदे कन्नै इस बैठक च शामिल होने लेई दिल्ली पुज्जी गे न। सांसद संजय झा होरें आखेआ जे एनडीए गी बिहार च जित्त हासल होई ऐ। लोक जनशक्ति पार्टी दे नेता चिराग पासवान होर बी एनडीए दी बैठक च हिस्सा लैने आस्तै नमी दिल्ली पुज्जी गए न। उंदी पार्टी नै बिहार थमां लोकसभा चुनां च 5 सीटां जित्तियां न।

<><><><><><>

## Delhi-BJP

दिल्ली भाजपा दे अध्यक्ष वीरेंद्र सचदेव होरें अजज दावा कीता ऐ जे होरनें राज्यें दे कारण आई.एन.डी.आई. गठबंधन दिल्ली च सारी सीटें उप्पर हारी गेआ। नमी दिल्ली च मीडिया आलें कन्नै गल्लबात करदे होई उनें आखेआ जे आम आदमी पार्टी ते कांग्रेस पंजाब च इक दुए खलाफ लड़ा करदे हे जेदा नुकसान उनेंगी दिल्ली च होआ। श्री सचदेवा होरें दिल्ली थमां जित्ते गेदे सत्तें सांसदें गी मबारकबाद दित्ती। आकाशवाणी कन्नै गल्लबात करदे होई श्री सचदेवा होरें आखेआ जे लोकसभा चुनां च जित्त औने आहले दिल्ली दे असेंबली चुनाएं दी जित्त दा संकेत ऐ। दक्खन दिल्ली थमां नमें जित्ते दे सांसद रामवीर सिंह विधुरी होरें आकाशवाणी कन्नै गल्लबात करदे होई आखेआ जे दिल्ली च जित्त पार्टी दी कड़ी मेहनत ते प्रधानमंत्री नरेंद्र मोदी हुंदे कम्मै दी सराहना दा नतीजा ऐ।

<><><><><><>

## World Environment Day

प्रधानमंत्री नरेंद्र मोदी होरें विश्व पर्यावरण दिवस दे मौके पर बुद्धा जयंती पार्क च इक बूहआ लाइयै 'एक पेड़ मां के नाम' अभियान दी शुरूआत कीती। इस अभियान दा मकसद मुख्य भरै च करोड़ां-बढ़े रूक्ख बूहटे लाइयै इक अनोखा जन आंदोलन बनाना ऐ। केंद्री पर्यावरण मंत्री भूपेंद्र यादव ते दिल्ली दे उपराज्यपाल विनय कुमार सक्सेना बी उत्थे मौजूद हे। विश्व पर्यावरण दिवस दे प्रति जागरूकता फैलाने ते पर्यावरण दे मुद्दे पर कम्म करने गी लेइयै मनाया जंदा ऐ। पर्यावरण दी राक्खी-हिफाजत बारै जागरूकता गी लेइयै संयुक्त राष्ट्र दे नेतृत्व च चलाया गेदा एह कुल संसारी सतह दा इक कार्यक्रम ऐ। इस ध्याड़े दी शुरूआत संयुक्त राष्ट्र महासभा आस्सेआ 1972 च मनुक्खी पर्यावरण पर स्टॉकहोम सम्मेलन दे दुरान कीती गई ही। पैहला विश्व पर्यावरण दिवस 1 बरे परेंत सन् 1973 च मनाया गेआ हा। एहदा मकसद पर्यावरण दे प्रति जागरूकता बधाना ते पर्यावरण सरबन्धी मुद्दें पर कुल संसारी सैहयोग गी बढ़ावा देना ऐ। राष्ट्रपति द्रौपदी मुर्मू होरें लोके कन्नै मिलियै इक बेहतर ते सैलतन आली दुनिया दे निर्माण लेई सांझे तौर पर जत्त करने दा आह्वान कीता। राष्ट्रपति होरें आखेआ जे धरती माता दी रक्षा करना स्हाड़ी बुनियादी जिम्मेदारी ऐ। तोआई उपराष्ट्रपति जगदीप धनखड़ होरें आखेआ जे मनुक्खताउ ते कुदरत दे बश्कार तालमेल गै टिकाऊ जीवन दी बुनियाद ऐ। उनें सब्बनें गी विश्व पर्यावरण दिवस दिआं शुभकामनां दित्तियां न।

<><><><><><>

## LG-WED

लेफ्टिनेंट गवर्नर मनोज सिन्हा होरें विश्व पर्यावरण दिवस पर अज्ज साजगारीपोरा श्रीनगर च इक सम्मेलन गी संबोधित कीता जेदा विषेसार ऐ स्हाड़ी जिमीं-स्हाड़ा भविक्ख। नगीन झील दे संरक्षण सरबन्धी संगठन आस्सेया लोआए गेदे इस कार्यक्रम च एलजी होरें पर्यावरण पर होए दे माड़े असर गी खत्म करने दी जरूरतै पर लो पाई। उनें आखेआ जे पर्यावरण गी सब्बनें शा मती तरजीह देना उंदी सोच ऐ ते ओह तबाह होए दे पर्यावरण तंत्र गी ओहदे असल स्वरूप च आहनने आस्तै बचनबद्ध न। उनें इब्बी आखेआ जे इस दिशा च कीते जाने आले सांझे जत्तें कन्नै रोजगार दे मौके बध्दन, खाद्य सुरक्षा जकीनी बनोग ते माड़े मौसमी हालात कोला बी बचेया जाई सकोग। एल.जी होरें गैर सरकारी संगठनें, माली इदारें, कारोबारी संगठनें, स्वयंसेविएं, सिविल समाज दे सदस्यें ते लोके दा बी आह्वान कीता जे ओह बदलाव आहनने आली ताकत बनन ते पर्यावरण दे संरक्षण लेई अपने आपै गी समर्पित करन।

<><><><><><>

## SMVDSB-WED

विश्व पर्यावरण दिवस दे मौके उप्पर श्री माता वैष्णो देवी श्राइन बोर्ड प्रशासन आस्सेआ इक अनोखी पैहल कीती गई। इस पैहल तैहत श्री माता वैष्णो देवी दे दर्शन करने आए दे श्रद्धालुएं गी प्रसाद दे तौरा उप्पर बूहटे देने दी प्रक्रिया अज्ज निहारिका भवन थमां शुरू कीती गई। श्री माता वैष्णो देवी श्राइन बोर्ड दे एग्जीक्यूटिव अफसर अंशुल गर्ग हों निहारिका भवन च शुरू कीते गेदे वैष्णवी वाटिका काउंटर दा उद्घाटन कीता। स्हाडे जिला संवाददाता देवेन्द्र ठाकुर हुंदे कन्नै श्री माता वैष्णो देवी श्राइन बोर्ड दे सीईओ अंशुल गर्ग ते किश श्रद्धालुएं गल्लबात करदे होई आखेआ।

<><><><><><>

## WED-Poonch

141 सीमा सुरक्षा बल नै पर्यावरण सरबंधी इक महत्व आहली पैहलकदमी तैहत विश्व पर्यावरण दिवस दे मौके उप्पर पुंछ च नियंत्रण रेखा कच्छ तकरीबन 3 ज्हार बूहटे लाए। अज्ज बडुलै बीएसएफ दे जवानें खल्के ते उप्परले खनेत्तर च मकामी लोकें कन्नै बूहटे लाइए विश्व पर्यावरण दिवस मनाया। ओहदे बाद बीएसएफ दे जवानें नियंत्रण रेखा कच्छ बूहटे लाए। 141 सीमा सुरक्षा बल दे कमांडिंग अफसर कर्नल नागेंद्र सिंह रोतेला हों स्हाडे जिला संवाददाता अनुभव मिसरी हुंदे कन्नै गल्लबात करदे होई आखेआ।

<><><><><><>

## WED-Kishtwar

सरकारी डिग्री कॉलेज किशतवाड़ नै विश्व पर्यावरण दिवस दे मौके उप्पर मैं धरती नां कन्नै इक नाट्य प्रस्तुति पेश कीती। एह नाटक Deptt. Of environmental sciences, the NSS Unit, kiru Hydro electric project CUPPL ते JKPCCL किशतवाड़ दे सहयोग ते प्रयास कन्नै कीता गेआ ते इस नाटक राहें पर्यावरण बारै जागरूक कीता गेआ। इस मौके उप्पर किशतवाड़ दे डिप्टी कमिशनर डॉ. देवांश यादव होर मुख परौहने हे। इस बारै गल्लबात करदे होई उनें आखेआ।

<><><><><><>